

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO – DOBOJSKI KANTON  
KANTONALNO TUŽILAŠTVO  
ZENIČKO – DOBOJSKOG KANTONA**

**Broj: T04 0 KT 0058848 24  
Zenica, 28.10.2024. godine**

**OPĆINSKI SUD U KAKNJU  
Sudija za prethodno saslušanje  
KAKANJ**

Na osnovu člana 45. stav 1. i 2. tačka i), člana 241. stav 1. i člana 242. Zakona o krivičnom postupku Federacije Bosne i Hercegovine (ZKP F BiH), podižem,

**OPTUŽNICU**

**Protiv:**

**K. M.**, Rješenjem suda u Kaknju određen pritvor dana 07.06.2024.godine, a isti je Rješenjem Suda u Kaknju dana 02.07.2024. godine ukinut i određene su mjere zabrane iz člana 140a. stav 1.c) ZKP F BiH, člana 140a. stav 1. tačka d) i člana 140b stav 3. ZKP FBIH, a koje mjere su Rješenjem Općinskog suda u Kaknju ukinute dana 26.09.2024. godine

Što je,

Dana 05.06.2024. godine, oko 21,30 sati, u Kaknju, dok se nalazio u UO „K...“ u ulici A.I. i dok se u ugostiteljskom objektu nalazio policijski službenik D. S. u društvu sa prijateljima Š. A. i Š. M., ozbiljno prijetio da će napasti službenu osobu u vršenju poslova javne sigurnosti policijskog službenika D. S., znajući da je isti policijski službenik, zajedno sa drugim policijskim službenicima MUP-a ZDK tokom 2023. godine prema njemu i drugim licima preduzimao određene istražne radnje, za koja je prijavljeni ranije osumnjičen, odmah po ulasku u ugostiteljski objekt se povišenim tonom obratio D. S. riječima: „p...o jedna, sve si znao, p...o jedna tebi su sve javljali na terenu, ti si rukovodio, sve si znao“, a potom gestikulacijom rukama i visokim tonom i dalje nastavio da se obraća D. S. govoreći: „p...o jedna, šuti, hajde samo nešto kaži“, aludirajući time da će istog udariti ukoliko bilo šta progovori, da bi potom prilikom izlaska iz objekta i ulazeći u pmv „Fiat Panda“ kojim se prethodno dovezao do objekta i izrekao ozbiljne prijetnje riječima: „j...m vam mater, sve ću vas pobiti“ iako je znao i bio svjestan da na ovaj način ozbiljno prijeti policijskom službeniku koji vrši poslove javne sigurnosti, što je i htio, a koje prijetnje su kod D. S. izazvale uznemirenost i strah za vlastitu sigurnost,

**Dakle**, ozbiljno prijetio da će napasti službenu osobu u vršenju poslova sigurnosti,

**Čime** je počinio krivično djelo Napad na službenu osobu u vršenju poslova sigurnosti iz člana 359. stav 1. KZ F BiH.